

# **La Vica poeta da Tiraun : en regurdientscha da Ludivica Lumbriser**

Autor(en): **Tschuor, Mariano**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **71 (1986)**

Heft 26

PDF erstellt am: **29.06.2024**

Persistenter Link: <https://doi.org/10.5169/seals-881675>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, [www.library.ethz.ch](http://www.library.ethz.ch)

## La Vica poeta da Tiraun

da Mariano Tschuor

### I.

Ils lecturs dil «Pelegrin» da pia memoria, da quella scatira che Pader Maurus Carnot haveva giu fundau all'entschatta da quest tschentaner, seregordan franc aunc dallas poesias che vegnevan signadas cun las inizialas «LL» ni magari era cugl entir num «Ludivica Lumbriser». Quei num ha buca anflau la via els cudischs sur dalla litteratura dils Romontschs e paucs san oz enzatgei d'ina dunna Ludivica Lumbriser. Sche nus seregurdein oz egl Ischi semestril dad ella, lu per buca schar ir en emblidonza quella dunna e poeta e pigl auter era per inagada puspei render attents alla funcziun che quels schinumnai «poets populars» han per ina societad.

Ei vegn magari detg ch'ils Romontschs sappien buca far ina fiasta, seigi quella lu da caracter privat ni ufficial, senza ch'ei vegni buca recitau poesias. Tons poets e poetins da poesias occasiunalas sco en tiara romontscha detti negliu, sedi ei. Podà che quels «poetins dallas caglias» ein pli spess en tiara romontscha che zanuas auter, jeu ughegiel denton da dubitar quei, pertgei sch'ins fa part inagada d'ina fiasta zanuas ella Bassa ni ella Romandia sch'ein ils poetins medemamein activs e reciteschan vers e remas tut insurin. Quellas poesias occasiunalas dattan colorit als eveniments, forsa era in cert patos ed ina certa peisa. Bein mintga tat e giubilar da 70 onns selegra sch'ils beadis reciteschan in pèr bialas remas e mintga societad da nozzas sedivertescha sche collegas ed amitgs san risdar en rema storgias e stuccas dil spus e dalla spusa. Ils «fabricants» da quellas poesias occasiunalas eran d'anflar inagada pil pli u en casa parvenda ni en stiva da scola. Ton sco mintga plevon en Surselva ha giu da «tschentar si» – sco quei che nus schevan cura che nus mavan tiegl augsegner e supplicavan da far ina poesia – in pèr versets per gratular a giubilars e nozzadurs. Ed era ils scolasts stuevan es-ser habels da metter ensemens in per remas che tunavan – duront recitar ellas – sco las veritablas trumbettas da Jeriho. Quellas poesias occasiunalas han giu lur funcziun ed han aunc oz ella, era quels che scrivevan e scrivan elllas han lur funcziun ed impurtonza, mo che nus duessen buca

survaletar ni igl engaschament ni il product. Ord quella laver da «poetin dallas caglias» (quella noziun ei beinmanegiada) ein certins sesviluppi ed han scret poesias da valur e qualitat. Lein numnar mo dus: Mihel Maissen e Luis Candinas. Gest Luis Candinas presenta en ses dus cu-dischs «Sulegliadas» (Romania, Mustér 1954) ed «Ord miu truchet» (Ediziuns Revista Retoromontscha, Cuera 1967) entginas poesias apartias ni per dir cun Reto R. Bezzola: «. . . schi as stu admetter cha valuors poeticas nu maunchan, eir scha'l poet (Luis Candinas) nun inchamina guera nouvas vias.» (Litteratura dals Rumauntschs e Ladins, Ligia Romontscha, Cuera 1979, p. 638). Ed en quei connex e context astgein nus era numnar Ludivica Lumbriser che ha entschiet cun la poesia occasiunala e che ha lu silsuenter scret era outras poesias da tempra tradiziunala.

## II.

Ludivica Lumbriser ei naschida ils 18 da matg 1902 a Tiraun, ina ucliva dalla fracziun da Zignau, che appartegn politicamein alla vischnaunca da Trun. Il bab dalla Ludivica haveva num Gion Matias Lumbriser. El haveva giu encuretg sia fortuna en Frontscha, fuva staus leu zatgei pils hotels, ei vegnius malsauns en in hotel a Paris ed ha bandunau la Frontscha 1891 per turnar anavos a Tiraun. Quei onn ha el maridau la Luisa Tomaschett. Ils consorts ein secasai a Tiraun ed han fatg il pur.

Ludivica Lumbriser ha frequentau las scolas dil vitg, la primara a Zignau, la secundara a Trun. Silsuenter absolva ella la scola da commerci egl Institut Sogn Giusep a Glion. 1921 vegn ella pladida sco secretaria ella fabrica da ponn a Trun e resta leu entochen 1929. Quei onn serenda ella a Fischingen ella Turgovia e lavura en ina casa dad orfens. Leu seigi ella stada bugen, sco quei ch'ella ha raquintau a mi, la laver en quella casa culs affons senza geniturs hagi plaschiu ad ella e quei ambient hagi influenzau ella zun fetg.

Ella retuorna anavos a Tiraun e va puspei en fabrica, quei entochen sia pensiun, excepiu ils onns da 1950 entochen 1954; duront quei temps eis ella viagiatura da caffè. Ils onns suenter la pensiun ha ella viviu, ensemble cun sias duas soras Catrina, naschida 1893 ed Onna Maria, naschida 1899 – omisduas vivan ussa egl asil sogn Martin a Trun – en casa paterna a Tiraun. Ils davos onns da sia veta eis ella stada cussadenta digl asil a Trun. Leu eis ella morta ils 16 da mars 1985.

## III.

El relasch da Ludivica Lumbriser sesanflan nundumbreivlas poesias occasiunalas: Per nozzas, battens, messas nuvialas, anniversaris, giubi-

Ieums da fatschenta, per hartas da morts ed inscripziuns per casas. Plaunsiu saveva la glieud da Trun e dil contuorn ch'ei detti si Tiraun ina dunna che fetschi poesias e cul temps ha ella survegniu il surnum «La Vica poeta».

Ina da sias empremas poesias ei ina meditaziun sur dalla mort, il santeri, la veta suenter la mort:

*Sper il santeri vi*

In di cul tren jeu mavel  
Sper il santeri vi  
E sin la tuor miravel,  
Ei fuva bi miezdi.

Jeu vesel bein plantada  
Sin fossa ina crusch,  
Ed audel commuentada  
A mi schend ina vusch:

«Las olmas ti emblidas  
Ch'ein pridas dalla mort?  
Las ein dal mund spartidas –  
Tgeinina ei lur sort?

Con spert il mund svanescha,  
Svanesch'en in mument!  
Bein spert s'approximescha  
Per tei il truament.

Il mund prest tei emblida  
Ramura sur tei vi,  
Eis ti dal mund spartida  
Retuornas maina pli.

Ei dat mo ina via  
Pils rehs sco per ils purs.  
Leu regia la giustia  
Per paupers e signurs.»

Duront ch'jeu contemplavel  
Las fossas cun dolur,  
Tier mei jeu patertgavel:  
Cu vegn per tei il tur?

Il tren profan camina,  
Sa nuot de quella vusch.  
Jeu vesel aunc adina  
Sin l'autla tuor la crusch.

#### IV.

Cun quella poesia ha la collaboraziun cun il «Pelegrin» entschiet. Da gliez temps pastorava Sur Gion Cadieli la pleiv da Trun. Sur Gion Cadieli, sez poet e sribent, haveva giu viu quella ed autras poesias dalla Ludivica Lumbriser. Ed el ha intimau ella da mussar quellas poesias a pader Maurus Carnot, il muntg dalla claustra da Mustér che haveva intimau tons e tons da scriver. Cunquei che la Congregaziun mariana da Trun fageva ual en quei interval in pelegrinadi tier la Mumma dalla Misericordia a Mustér, ei Ludivica Lumbriser sedecidida da separticipar e da mussar sias poesias al «bien pader Maurus». Quei ch'ella ha lu pilvermo era fatg.

Pader Maurus hagi giu plascher dallas poesias e forsa era dad ella sezza, ha la Ludivica giu detg inagada a mi, en tutta cass hagi pader Maurus salvau las poesias per publicar ellas el «Pelegrin». Quei ei stau l'entschatta d'ina relaziun amicabla che ha cuzzau entochen alla mort da pader Maurus 1935. Pader Maurus seigi savens staus sin viseta a Tiraun ed hagi mussau ad ella da far poesias, currigevi quellas ch'ella havevi gia fatg, intimavi ed animavi continuadamein. Grazia a pader Maurus ha la stampa da Giusep Condrau publicau 1930 in cudischet «Flurs cuolm» cun poesias da Ludivica Lumbriser. Igl ei 23 poesias, classificadas els dus temas «Miu cor» e «Mia patria», poesias en stil, lungatg e fuorma tradiuinala, per part originalas, per part translatadas dil tudestg. Cun la mort da pader Maurus ha Ludivica Lumbriser calau plaun plaunsiu da far poesias, auter che las occasiunalas. Sch'enatzgi vegnevi dad esch en per ina poesia da nozzas, sche savevi ella nun grazia dir na, ha la Ludivica detg a mi. Igl ei buca mo stau la mort da pader Maurus che ha frenau la lavur dalla poeta. Ella piteva pli e pli fetg d'in maliltgau, d'in sgarscheivel maliltgau cronic. Ils davos onns da sia veta ha Ludivica Lumbriser buca scret poesias, era buca occasiunalas.

Quellas ch'ella ha giu scret, specialmein sut l'egida da pader Maurus Carnot, da Sur Gion Cadieli e per part da Sur Carli Fry (lez hagi zuar vi lentau ella inagada, perquei ch'el vevi priu in text d'ina poesia ch'ella havevi giu scret e publicau quel sut siu num, ei setracta dalla enconus schenta canzun «Vitg e val fan serasontga»), ein vegnidas publicadas, ultra dil Pelegrin, ellas periodicas usitadas digl intschesch sursilvan: Calender Romontsch, Ischi, Glogn e secapescha Gasetta Romontscha.

## V.

Abstrahau dallas poesias occasiunalas selaian las poesias da Ludivica Lumbriser classificar – sch'ins vul insumma far quei – ellas tematicas suandontas: Religiun, Patria e Famiglia, Natira e Flurs, Mort. Ei croda en egl ch'il fasch cun las poesias religiusas ei il pli voluminus. Las fiastas ecclesiasticas vegnan descretas, sentiments religius, oraziuns. Ella categoria «Patria e Famiglia» anflein nus adina puspei il tema dil lungatg romontsch, dil liug nativ, dil Rein, dalla Surselva insumma e lu las biaras poesias dedicadas alla mumma. Sut «Natira e Flurs» anflein nus las poesias dallas malauras da 1927 che han devastau e destruiu ina part dil vitg-sut da Zignau, las bovas ed ils urezis e stempraus, lu las differentas poesias da flurs, specialmein la rosa e la flura da matg. Ina categoria speciala ei quella ch'jeu hiel intitulau «mort». Il tema dalla var gheivladad ei in tema preferiu da Ludivica Lumbriser e quei tema semanifestescha en variantas las pli differentas: Il schuldau moribund, La fossa, Sas bargir ti ina larma, Vargau, Miu destin, Il mund en uiara etc. E forsa eis ei era significativ che Ludivica Lumbriser ha scret sper las poesias da caracter religius las biaras cul tema dalla mort, d'ina veta en in auter mund.

Ludivica Lumbriser ei in affon da siu temps, influenzada da pader Maurus, da Sur Cadieli e Sur Fry, che ha viviu sco poeta en in temps d'in neoromantissem sentimental (per part silmeins) ed en in temps nua che baselgia e societad cumandavan tgei ch'il carstgaun astgi crer e tgei buca, nua che la controlla dallas instituziuns funcziunava. In tal temps segna in carstgaun. Che Ludivica Lumbriser ha buca emprau da siglir sur la seiv e rumper cadeinas ei buca da far curvien. Sia veneraziun quasi affonila per pader Maurus havess mai schau tier enzatgei auter. Aschia fladan sias poesias il clima da quei temps, ellas ein attaschadas allas valurs tradiziunalas, ellas confirmen quei ch'ei vegniu detg ad ella giud scantschala ed ellas resplendant enzaco il patertgar dils biars car stgauns che han viviu quei temps.

La Ludivica Lumbriser ha mai giu l'impressiun dad esser poeta. Jeu hael empriu d'enconuscher ella sco ina persuna mudesta en demanonza e tenuta. Retratgamein ha ella viviu e luvrau e scret sias poesias «per far in plascher ad in ni l'auter» sco ella haveva per moda da dir.

Nus publichein cheu egl Ischi semestril entginas da sias poesias sco pintga enuesta rudimentara en la lavur da Ludivica Lumbriser, la «Vica poeta da Tiraun».

### *Miu liug nativ*

Sil crest che mira giu el Rein,  
De tut sil mund schai il pli bein,  
Miu vegl, miu pign mo bi uclaun,  
Miu vitg nativ, il car Tiraun.

Da bials curtgins eis el tschinclaus,  
Bein lunsch naven da gronds marcaus,  
Mo cheu san ins ruasseivels star,  
En pasch e tgeuadad avdar.

Las casas brinas dal sulegl  
Che leva tarlischont marvegl,  
Baghiadas ein von tschuppels onns,  
La ierta de nos perdavons.

Cun bab e mumm'hai passentau  
Cheu senza nin pli grond quitau,  
De tut il sempel mai unfis,  
De mi'affonz'il paradis.

E sas ti ussa dir a mi:  
Nu ei per mei sil mund pli bi,  
Che sin quei crest il pign uclaun  
Miu liug nativ, il car Tiraun?

*La patria spel Rein*

Il giuven Rein camina  
Spimond tras la Cadi,  
Salida val, collina,  
Stat buca cun nus pli

Sin il Badus la tgina  
Dil Rein ei ded anflar,  
Naven da leu festgina  
El tochen tier la mar.

Dals autls il Rein salidan  
Ruinas de castials,  
Els muossan, co semidan  
Ils dis ch'ins numna bials.

Capluttas sper las undas  
Tarlischau sco cristal,  
Uclauns e vitgs sin spundas  
Embialan nossa val.

La pezza tut curclada  
Cun la perpetna neiv  
Embraunca la vallada  
Cun ina ferma seiv.

Con bi cur che sclareschan  
Ils radis dil sulegl,  
La pezza embelleschan  
Ed ils glatschers marvegl.

In di cu jeu stoi prender  
Da mia val cumiau,  
Lu vi jeu aunc serender  
Spel Rein schi carezau.

*Mia mumma*

La sera che jeu mondel  
Tut stauncla a ruaus,  
Sper la finiastr'aviarta  
Jeu fetschel aunc in paus.

Dal tschiel mir'ina steila  
Migeivla giu sin mei.  
Jeu vesel cun legria,  
O cara, steila, tei.

Salida mia mumma  
Cun tiu carin surrir  
Ch'jeu resti, di, fideivla,  
La drovi mai bargir!

E di ch'ell'olma mia  
Duas steilas ardien clar:  
Siu plaid dil di d'adia:  
«Stai buns, affon miu car!»

Sil frunt lu la cruschetta  
Che siu maun benediu  
Ha fatg tier la partenza:  
«Sche va e stai cun Diu!»

Ch'jeu tuorni, di, a casa,  
Per ella salidar:  
«Cartent'ed innocentia,  
O mumma, sai turnar!»

*La malaura*

Sin la pezza gia tarlischa  
Il sulegl della damaun.  
Cu descenda la calira  
En la val e giu el plaun.

Adumbatten oz che spetgan  
Praus e pradas tut en flur.  
Seschlihond davos las neblas  
Zupp'el sia tarlischur.

A furiond tras la vallada  
Vegn il vent a tahegiond.  
Slondas tetg sin via sgolan,  
Fai adatg, ti viandont.

Vid il tschiel ein neblas neras  
Ferm ei dracc'ad in draccar.  
Per las vias auas cuoran  
Ei entscheiv'a rumplanar.

Il cametg cun forza croda  
Giu sil mund, o tgei snavur!  
Sco la siarp siu fiug sestorscha  
Tarlischonta da cotschnur.

Dutgs e reins sburflonts ramuran  
A ca-sia tuorn il pur.  
El stemprau terment ruaussa  
Or el liber la lavur.

Tgei ei quei sin la muntogna  
Che rampluna aschizun?  
O, la tiara che semova  
In sbuau crod'el dargun.

Il zennet tremblont resuna  
Dal clutger cun ferma vusch:  
Il Salvador mai banduna  
Tgi che stat sut sia crusch.

*Il schuldau moribund*

Sil camp de battaglia  
Trests schai il schuldau,  
Sin tiara bugnada  
De saung il plagau.

Las levzas tut schetgas,  
Il frunt calirau,  
Sepeina per l'ura  
De mort il curdau.

Sil pèz ord la plaga  
Sgarguglia il saung.  
Tremblond tegn el quella  
Bufatg cun il maun.

Da lunsch dals de casa  
Arriva la fin.  
Sin l'ura finala  
Assista negin.

Mo in desideri  
Fa el aunc pitir  
El less tier la mumma  
A casa murir.

Da lunsch alla mumma  
Salid cordial,  
Davosa fladada  
D'in pauper mortal.

*Lieungas nauschas*

Ei schabegia en la veta  
De tscheu giu bein tontas ga,  
Che sin auters crapp'ins betta  
Ch'ins savess bein sez duvrar.

Quei ei lieungas tussegadas,  
Ellas taccan noss'honur.  
Ellas ein cumpatg mo dadas  
Per als auters far dolur.

Ellas muossan mo l'umbriva,  
San dil proxim mo il mal.  
Tala glieud sto esser viva  
Per sils auters dar cul pal.

In plaidet ti spert confidas,  
Senza auter patertgar,  
Enzatgei ti aunc emblidas:  
De tiu plaid duas ga pesar.

E cun quei ti fetg setrumpas:  
D'in muschin vegn in cavagl.  
Ei va bein sche ti mo scompas  
Dallas lieungas e lur tagl.

O vus lieungas cannibalas,  
Vus che tut stueis scurvanar,  
Gnanc las flommas infernalas  
Vossa cuolpa pon lavar!

*La damaun*

Bufatg sesaulza il suegl  
Davos la pezza neuasi.  
Lodola conta bein marvegl  
«Seis beinvegnius ti giuven di.»

O car zennet, ti clomas clar  
Giud sontga tuor atras la val:  
«Sil mund duei sedestadar  
Tut tgi che auda quei choral.»

Carstgaun, sche sappies engraziar  
Pil dultsch ruaus che Dieus ha dau.  
Dacormein veglies Diu ludar  
Cul zenn che ha tei destadau.

Va legramein tier la lavour  
Il Segner vegn a benedir  
Per tutta breigia e snavur  
Che ti per el vul bein suffrir.

La sera clom'il zenn puspei  
Igl Ave tras la val.  
Cu vegn il dultsch ruaus per tei,  
Il dultsch ruaus final?

*La primavera*

Sesend giusum miu car curtgin  
Jeu mirel giu el Rein.  
Sur mei tarlischa sco rubin  
Il tschiel entir serein.

La biala primaver'ei cheu  
Il freid unviern vargaus.  
Jeu vesel finas tscheu e leu  
Las fluras sin tuts praus.

Sin plonta conta in utschi  
A nus vul annunziar:  
«El ei neutier il temps pli bi  
Il temps de selegrar.»

Leugiu el funs revolv'il Rein  
Las undas speras vi.  
Empiara misteriusamein  
«Tgei dat quei onn a ti?»

*In giavisch dil matg*

Cun legria terlischonta  
Jeu patratgel aunc dils dis  
El bi temps de mi'affonza  
Semeglionts al paradis.

Sco la permavera varga,  
Varg'il temps er'il pli bi,  
Che jeu mavel sin la prada  
Per las fluras d'in tschupi.

Affonets las flurs tschentavan  
Sco per cruna sin nies tgau:  
Gelgias alvas, rosas cotschnas  
Sin in frunt immaculau.

Con bugen fagess jeu ussa,  
O aunc ussa tal tschupi!  
Buca per cun loschas fluras  
Far entuorn miu frunt rudi . . .

Jeu enquarel cheu sin tiara  
La pli biala casta flur,  
Che flurescha vi sur fossa  
En perpetna tarlischur:

Segner Diu, fai che jeu creschi  
En la flur della vertid!  
Meina mei atras la veta  
Sin la via dil salit!

*La steilalva*

Si ault sin la muntogna  
Orsum il grep sigl ur,  
Flurescha la steilalva  
La casta, biala flur.

Naven dalla canera  
Dil mund cun siu cunfar,  
Vul ella sin la greppa  
Persula verdegar.

Color dell'innocenza  
Resplenda siu vestgiu;  
Ell'ei il pli maneivel  
Leusi dil tschiel stelliu.

Il paster ch'alla biala  
Vul dar siu meglie matg,  
Serenda silla pezza  
Per rumper tei bufatg.

O ti bellezi' alpina  
Ti innocentia flur,  
Ornasses ti adina  
Mo cors de pur amur!

## *La glisch de Nossadunna*

Stgira sera, neblas grevas  
Quarclan nossa tgeua val.  
Tscheu e leu ina cazzola  
Aunc tarlisch'el vitg natal.

La davosa prest svanescha  
Tut semetta a ruaus.  
Cun fidonz'el maun dil Segner  
Il carstgaun tschent'ils quitaus.

Tard la sera jeu caminel  
Sur la punt dil giuven Rein,  
En patratgs tut profundada  
Tut persula tgeuamein.

Tuttenina mi compara,  
Di, tgei sai jeu observar?  
Sil clutger de Nossadunna  
Ina glisch a tarlischar.

Ella guard'en la vallada  
Sco sche ella less clamar:  
Della Glisch la cara mumma  
Sin quei crest stueis venerar!

Pelegrin perquei sepeina,  
Pren il fest de viandar,  
Si sur Trun sin la collina  
Vegn Maria a gidar.

*La crusch*

Miu cor empiara savens sin tiara  
Pertgei tut quei?  
Pertgei la stenta? Pertgei tementa  
La veta tei?

Cul cor suspira e l'olm'endira,  
Setegn vid Diu!  
Nies bab envida l'olm'elegida,  
Enquer'il siu.

Pren obedeivla la crusch custeivla,  
L'ei tia sort.  
Dieus tut ordeina, la veta meina  
Fin alla mort.

*Buna notg*

Tgeuamein il di s'enclina  
Alla fin per ruassar.  
Jeu salidel miu Salvador  
«Buna notg, miu Jesus car!»

Tutpussent, la glisch perpetna  
Veglia tei avon gl'altar,  
E migeivel aunghels contan:  
«Buna notg, miu Jesus car!»

Segner Diu, mei benedescha!  
Da tut mal stos pertgirar  
Mei e tut mes cars de casa.  
«Buna notg, miu Jesus car!»

Con bugen, o dultsch Salvador  
Von gl'altar jeu less vegliar!  
Mo mes staunchels egls seclaudan:  
«Buna notg, miu Jesus car!»